

1647. 15. mai.

M. Arnault
de la frequente communion
Secur. de l'Inquisition de Rome.

ARREST

DV PARLEMENT,

Touchant vn Decret de l'Inquisition de Rome publié dans Paris sous ce titre, *Decretum S. D. N. D. Innocentij X. diuinâ prouidentiâ Papæ aduersus propositionem istam : Sanctus Petrus & Sanctus Paulus sunt duo Ecclesiæ Principes qui unum efficiunt, & libros in quibus illa propositio assertitur & defenditur.*

D

D


THE NEWBERRY
LIBRARY

Case
F

39

326

1697fp



DISCOVERS
DE MONSIEVR TALON
ADVOCAT GENERAL,

Tenu en la Grand'-Chambre le 10. May
1647. sur le sujet de ce Decret.

MESSIEURS,

Nous receusmes Mecredi dernier ordre de la Cour de nous informer de la verité d'une Bulle imprimée depuis quelques jours, & de la Sentence renduë par le Preuost de Paris Lundy dernier, par laquelle il a condamné vn petit Escrit & Libelle contenant vne fueille de papier, lequel Escrit est contraire à l'autorité de cette Bulle. Outre plus, le mesme jour nous entendismes ce qui se passa en la presence de la Reyne touchant la mesme affaire, où il vous pleust, MONSIEUR, faire entendre les mouuemens de la Compagnie, & les

4
raisons qu'elle auoit de s'opposer à l'entre-
prise de Monsieur le Nonce du Pape, le-
quel vouloit insensiblement establir vne
iurisdiction nouvelle dans le Royaume. En
suintte duquel discours la Reyne nous ayant
appelez, & ayant entendu par nostre bou-
che quelque chose du destail de cette af-
faire, & depuis en ayant esté parlé avec
Monsieur le Cardinal Mazarin, Monsieur
le Chancelier nous fit entendre qu'il falloit
faire difference entre la Bulle emanée de
l'autorité du Saint Siege, pour l'impression
& publication de laquelle il y auoit eu Pri-
uilege du Roy, d'avec ce qui pouuoit estre
du mandement ou certification de Mon-
sieur le Nonce, lequel ne faisoit point par-
tie de la Bulle, & qui auoit esté adiousté à
l'impression sans son sceu. Que pour le re-
gard de la Bulle il estoit aduantageux à
l'autorité Royale, qu'un Nonce du Pape
fust suppliant aupres de sa Majesté pour luy
demander la permission de faire imprimer
& publier vne Bulle de la Cour de Rome
concernant le spirituel, & que l'impression
qui en auoit esté faite, & l'enuoy aux Eues-
ques estoit fondé sur la permission de l'au-
torité du Roy. Que si le Nonce dans l'Im-
primé a fait adjouster quelque chose du

5
sien, cette addition ne fait pas partie de la Bulle ny du Priuilege donné à l'Imprimeur, dans lequel il n'est parlé que du Decret, lequel Decret le Roy a considéré comme vne censure faite en vne matiere de doctrine, laquelle il a trouué bon estre imprimée en la mesme sorte, que s'impriment & se publient les Censures de la Faculté de Theologie de Paris. Au sur plus dans la derniere Edition qui a esté faite de cette Bulle, le mandement & certificat du Nonce n'y ayant esté adiousté.

En suite nous auons voulu voir les pieces concernantes cette affaire, dans laquelle nous auons trouué trois choses principalement à redire.

La 1. que l'on ait imprimé en France, publié & voulu executer vn Decret de la Congregation de l'Inquisition du Saint Office, & qu'on l'ait intitulé, *Decretum Sanctissimi D. N. D. Innocentij X. diuina prouidentia Pape*, sous pretexte que le Pape a assisté & s'est trouué present à cette Congregation. Car nous reconnoissons en France l'autorité du S. Siege, la puissance du Pape Chef de l'Eglise, Pere commun de tous les Chrestiens. Nous luy deuons toute sorte de respect & d'obeissance. C'est le

creance du Roy Fils aîné de l'Eglise, la
 creance de tous les Catholiques & de tous
 ceux qui sont dans la véritable Commu-
 nion : Mais nous ne reconnoissons point
 l'autorité ny la jurisdiction des Congrega-
 tions qui se tiennent en Cour de Rome, les-
 quelles le Pape establit comme bon luy
 semble : Mais les Decrets & les Arrests de
 ces Congregations n'ont point d'autorité
 ny d'execution dans ce Royaume, & lors
 que dans les occasions des affaires conten-
 tieuses, tels Decrets se sont presentez com-
 me en matiere de Dispenses, de nullité de
 Vœux, de translation de Religieux, & au-
 tres semblables, la Cour a déclaré, que les
 Brefs de cette qualité estoient nuls & abu-
 sifs, sauf aux parties à se pourvoir par les
 voyes ordinaires, c'est à dire dans la Chan-
 cellerie, dans laquelle les Actes sont expé-
 diés au nom de nostre Saint Pere le Pape,
 en la personne duquel reside l'autorité le-
 gitime. Et pour ce qui regarde les matieres
 de la Foy & de la doctrine, elles ne doiuent
 point se terminer dans ces Congregations,
 sinon par forme d'aduis & de conseil, & non
 pas de puissance. Il est vray que dans ces
 Assemblées se censurent les Liures suspects
 d'herésie & de mauuaise doctrine, & que

dans icelles se fait l'*Index Expurgatorius*, lesquels s'augmente tous les ans, & c'est-là où autrefois ont esté censurez les Arrests de cette Cour mesme, l'Arrest rendu contre Iean Chastel, l'Histoire de Monsieur le President de Thou, les Libertez del'Eglise Gallicane, & tous les autres qui regardent la conseruation de la personne sacrée de nos Rois, & l'establissement de la Iustice Royale.

Que si le Decret dont il est question, & les autres de cette qualité estoient publiez & autorisez dans ce Royaume, ce feroit en effet y receuoir l'Inquisition par cette remarque qui semble ne pouuoir receuoir de responce, sçauoir, que cette Congregation prend cette qualité, *Generalis & vniuersalis Inquisitio in vniuersa Republica Christiana aduersus hæreticam prauitatem*, par le moyen dequoy ils pretendent pouuoir faire le procez aux sujets du Roy, comme ils pensent auoir droit de le faire aux Liures qui sont imprimez dans ce Royaume. Ainsi ayant examiné le titre de ce Decret emaré de l'Inquisition, avec ces paroles telles qu nous les auons représentées qui tesmoignent vne pretension d'autorité vniuerselle, nous auons creu estre obligez de les re-

marquer à la Cour pour luy en faire nos protestations fuiuant le deuoir de nos Charges.

La 2. chose que nous auons remarquée est le mandement ou certification de Monsieur le Nonce imprimé au pied de cette Bulle , dans lequel il se qualifie , Nonce proche la personne du Roy dans tout le Royaume de France , termes insolites & extraordinaires, parce que le Nonce faisant en France fonction d'Ambassadeur , & n'en pouuant faire d'autre , il n'a point d'employ que proche la personne du Roy, & n'en a aucun autre dans ce Royaume. Et s'il a pensé deuoir parler du Royaume il a deû parler du Royaume de France & de Nauarre , estant certain que l'omission du dernier est d'ordinaire affectée , & ne se fait pas sans dessein. Outre ce mandement & certification nous auons remarqué ces paroles , que le Nonce dit auoir receu mandement du Pape de faire imprimer ce Decret, laquelle impression estant chose purement temporelle , & faisant partie de la police ne peut estre faite que par autorité du Roy, ou du Magistrat.

La 3. chose est en ce qu'il dit que l'original de ce Decret est demeuré dans les Ar-

chiues de sa Nonciature, laquelle maniere de parler ne conuient pas à nos mœurs, parce que le Nonce du Pape n'a point en France de Greffe ny d'Archives non plus que les Ambassadeurs des autres Princes, ny que l'Ambassadeur du Roy n'en a point lors qu'il est à Rome.

En dernier lieu il adjouste que cette Bulle sera enuoyée aux Euesques & Archeuesques de sa Nonciature, comme si la qualité de Nonce auoit aucun territoire certain & limité. Et d'autant que cette maniere de parler est vne entreprise nouuelle & naissante nous estimons qu'il y a lieu d'y pourvoir.



Extrait des Registres du Parlement, du 15. May 1647.

CE jour la Cour ayant deliberé sur la Remonstrance & Conclusions du Procureur General du Roy, contenües és Registres du 10. de ce mois, concernant certain libelle intitulé , *Decretum Sanctissimi D. N. D. Innocentij X. diuinâ providentiâ Pape aduersus propositionem istam: Sanctus Petrus & Sanctus Paulus sunt duo Ecclesie principes qui unum efficiunt, & libros in quibus illa propositio asseritur & defenditur*, imprimé à Paris par Sebastien Cramoisi Imprimeur ordinaire du Roy en la presente année 1647. à la fin duquel est copie d'un Acte fait à Paris le 13. Mars dernier, signé *Nicolaus Archiepiscopus Athenarum*, par lequel ledit Archeuesque d'Athenes se dit Nonce Apostolique pres le Roy Tres-Chrestien, & en tout le Royaume de France, & que par special mandement de sa Sainteté donné à Rome, il a fait imprimer la copie dudit Decret sur son Original gar-

dé dans les Archiues de sa Nonciature, pour l'enuoyer à tous les Ordinaires de ladite Nonciature & autres à qui il appartient; ce qui est vne nouueauté & entreprise contre l'autorité du Roy. Et veu ledit Decret fait en l'Inquisition de Rome le 25. Ianuier dernier, & autres Bulles & Bref. Tout considéré, LADITE COUR a fait inhibitions & deffences à tous Archeuesques & Euesques, leurs Vicaires & Officiaux, Recteurs & supposts des Vniuersitez, de receuoir, faire publier & executer les Decrets & autres Actes de la Congregation de l'Inquisition de Rome, comme aussi toutes autres Bulles & Brefs sans la permission du Roy verifiée en la Cour, sans neantmoins que les prouisions des Benefices & expeditions ordinaires concernans les affaires des particuliers qui s'obtiennent en Cour de Rome, suiuant les ordres du Royaume & loix de l'Estat, soient comprises es susdites deffences. A ORDONNE' ET ORDONNE, que tous les Exemplaires dudit Decret de l'Inquisition, en date du 25. Ianuier dernier, seront saisis à la Requeste du Procureur general, & apportez au Greffe de ladite Cour pour estre supprimez. Fait deffence à toutes personnes de

les auoir & retenir sous les peines des Ordonnances. Enjoint à tous Imprimeurs & Libraires garder & obseruer les Reglemens sur le fait des Impressions, à peine d'amende arbitraire, & au Substitut dudit Procureur General faire diligence d'excuter le present Arrest & d'en certifier la Cour au mois, à cette fin sera enuoyé aux Bailliages & Seneschauffées à la diligence dudit Procureur General. Fait en Parlement le quinziésme May mil six cens quarante-sept.

Signé,

DV TILLET.